



鄰舍屋下个「時囉」

「時囉」係鄰舍屋下畜个白狗，佢个名仔係日本話「しろ（shi ro）」，白色个意思。佢當馴良又會摻人做嬌，佢兜搬來這隻社區了後，歸家人都摻佢結朋友。

第一個發現著「時囉」个人，就像佢屋下最有冒險精神个滿女。逐日臨暗仔放學轉屋，佢就騎等自行車滿哪去巡邏，看哪家人个庭仔有畜兔仔、鳥仔，哪家人有狗，哪條狗一等惡...，社區裡背不管哪隻壁壘角个細動物，都分佢調查到詳詳細細。莫怪喔！該駁仔，冰箱肚个東西長透毋見忒。

「時囉」當熱情，遠遠看著喊佢一聲，佢就緊拂尾，黏時叮叮噹噹走等過來。來到人旁，頭那就緊堵等來愛分人，拏到鬆爽咧，將就睡落地泥頂，愛人惜較久兜。該面皮皮个做嬌樣像，想毋惜佢也盡難啦。「時囉」个主人毋識綯佢，放佢透日自由自在遊寮，在社區肚摻該兜「狗黨」共下搞，摻該兜分人擲核核个狗比起來，佢个日仔實在過到還幸福哪！

有一日佢下班，車仔一駛啊落社區，分在路脣啄目睡个「時囉」看著，佢跋腳就追等來，等佢下車，佢既經在門口接佢咧。還有一擺，佢當晝轉屋下，拿一項東西又出門，車仔愛駛出巷口个時節，聽著熟事个玲琅仔聲，對照後鏡一看，啊喔！還感心，盲知係「時囉」在後背追到氣急急仔，佢煞煞停車攞手喊佢轉去，心肝想，暗夜佢係來過家該下，正拿一坵較有肉个骨頭分佢喫。

該量時開始，佢妹仔摻庭仔徙出一隻位所分佢歇暍，還準備一隻碗裝點心分佢食。「時囉」也像形摻佢屋下看做佢个「別館」樣，逐日來報到毋轉厥狗竇。成時，還愛麻煩佢个主人來尋，大嫫牯聲咄佢，佢正肯乖乖跔等轉屋下。

有一擺佢在社區散步，正知「時囉」个「人緣」恁好。戴就近个人不管麼儕喊佢，佢就歡歡喜喜走過去，係講有人對佢好，佢就記入心，用真情真意來答謝人。背尾，有一暫時無看著，聽講佢身體毋好發病仔咧，厥主人無放佢出來。

這下，雖然「時囉」既經離開幾下年咧，佢兜見擺還會想著佢生趣个事情，摻該得人惜个身影，也非常感謝佢帶分佢兜歸家人快樂个時光。

作者：陳美燕

☆詞彙學習☆

- | | |
|-------------------------------|--------------|
| 【馴良】shun liong：形容人或動物性情柔順而善良。 | 【綯】to：以繩索拴住。 |
| 【做嬌】zoˊ giauˊ：撒嬌。 | 【跋】bag：爬起來。 |
| 【拂尾】fidˊ muiˊ：搖尾巴。 | 【喫】kieˊ：啃、咬。 |
| 【堵】duˊ：推。 | 【咄】dod：喝叱。 |